



# Sujet: No Señor!

## Grosswildjagd uff iberianisch

Gärn schmiidet me si uus Titaan,  
füürverzinggt, lycht zemendiert,  
für die wo hänn mit zvyyl Elaan  
die alti Huft grob maltrediert.

Esoo passiert s em König Juan,  
Carlos mit zwaitem Namme,  
dä isch en eltere Dummian  
und stolperet halt amme.

Bym e Raisli no Botswana,  
d Sofia blybt zrugg im Schloss,  
s Schätzli nimmt är mit dört ana,  
botscht är in s Rhinozeros.

Es kracht und denn dr stächend Schmärz,  
dr Carlos verdrüllt kurz d Auge,  
das Gfüül um d Huft, e kain begäart s,  
sy Gsicht isch gääl wie Lauge.

Hätt är verwütscht dr nächst Momänt  
bym Zieh an syn're Flinte  
wär s Viich erlegt, s isch dekadänt,  
är säss nit in dr Dinte.

Dä Tscholi bricht sy adlig Huft  
im fremde Land bym Jaage,  
seet sich in dr Familiegruft,  
und s drüllt em lycht dr Maage.

Sy Begleitere maint, si kennt  
e schwarze Medizynmaa,  
waiss nimm nächst wo, aber si rennt  
in Urwald, so gschwind si kaa.

Mit Blattfiess und wyssem Kittel  
kunnt uss em Wald e Männli.  
Är syg Scheff im Urwaldspittel  
und serviert Tee im Kännli.

E Hängematte syg grad frey  
und zwar die im OP dängg.  
Dört montiert är ooni Arzney  
s neue Sulzer Titaanglängg.

Dr Juan Carlos gsundet beschtens,  
ka bald zrugg no Spannie,  
vergisst gly dä Jääger-Nonsens  
und verby sinn d Ferie.

Am Flugiplatz deheim z Madrid,  
dr Zoll ka s nit begryffe,  
entdeggt me syni Requisyt,  
d Schleuse dien aafoo pfyffe.

E groosse Zaan uus Elfebai,  
au e Fäll vom Leopard,  
vom Voogel Struss s ussbloosen Ai,  
em Pygmää sy Hellebard.

E schön gwällti Leuemääne,  
dr langi Hals vom Gyraff,  
s Lache von ere Hyääne,  
e Näägerseggel, ebitz schlaff.  
D Hörner vom e Wasserbüffel,  
e Duume vom Gorilla;  
mainsch, dä griegt e schöne Rüffel,  
was macht dä, um Gottswilla?

Hät är bym Nashorn besser braicht  
wär au das Horn im Gephägg.  
Die neu Huft isch drfür guet gaicht,  
dorum het är jetz dr Drägg.

Gwüsst het niemerts vo däre Rais,  
doch dä Umfall machts bekannt.  
Gryteled wird dä Königs-Grais,  
d Spannioggle finde s aller Hand.

Langsam kunnt au är in s Schwitze.  
Ebitz eerehalber duet  
är em WWF vorsitze;  
muess drum nää sy Jääger-Huet.

Isch ass König dä no draagbar,  
grad au no mit Proteese?  
An dr Fasnacht dörft dä, s isch glaar,  
nit emool uff e Chaise.

Scho ass Bueb duet är Jäägerle,  
s Kinderzimmer isch s Revier,  
am Gweerli umme käschperle -  
sy Brueder dringgt nie e Bier.

Wär abdruggt het, das isch no d Froog,  
s sinn aber alti Gschichte.  
S Gweer liggt im Meer, für mi mee d Bloog  
was könnt me doo no dichte?

Mr könnten au uff d Groosswildjagd  
no dr Basler Bolitygg -  
die Gschalte sinn gar seer abschtraggt -  
doch dä Zeedel isch vvyyl z schygg!

Au d Basler Froog um die Fusioon,  
die löön mir besser blybe.  
S isch haissi Luft im e Balloon:  
ka men im BL schryybe?

Drum blybt mr no zem Schluss, das wär s,  
blybet nur sitzen uff em Stuel,  
dr Ladäärne-Uusstelligsvärs  
und s Inserat für d Pfyfferschuel.

**D Ladäärne-Uusstellig uff em Münschterplatz und d Waage- und Reggwisyte-Uusstellig bi dr Kasäärne sin vom Määntig nacht bis am Mittwoch demoorge! Dört und an de 3 Verkaufsständ (CINS) in dr Stadt kämen au alli Zeedel und Schnitzelhängg, d Blaggedde und dr Rädähäng kaufe.**

**Am Fritig und Samschtig, 22. und 23. Hornig isch Noochwuggswärbig vo dr 1. Lektion im Zält uff em Barfi.**